

Yanapendeza Jinsi Gani Maneno Yanenwayo Wakati Ufaao

Neno linenwalo wakati wa kufaa, Ni kama machungwa katika vyano vya fedha—**Mithali 25:11.**

Yesu alitawala mazungumzo alipokuwa kwenye sherehe na alitoa mafunzo mengi ya thamani. Je! Wale waliokuwepo wangemsikiliza; kama angelikuwa hajawaponya wagonjwa wao, kuwafariji wenye huzuni wao na kuwachukua watoto wao mikononi Mwake? Watoza ushuru na wenye dhambi walivutwa Kwake; na alipoongea, usikivu wao ulivutwa Kwake.

Yesu aliwafundisha wanafunzi Wake jinsi ya kuenenda wanapokuwa katika mikutano na watu. Aliwafundisha kuhusiana na majukumu na kanuni za maisha ya ushirikiano wa kweli, ambavyo ni sawa tu na sheria za ufalme Wake. Aliwafundisha wanafunzi kwa mfano, kwamba wanapohudumia mikutano ya hadhara, hawahitaji kupungukiwa kitu cha kusema. Mazungumzo Yake alipokuwa kwenye sherehe yalitofautiana kwa uwazi zaidi na yale ambayo yalikuwa yamesikika kwenye karamu zilizopita. Kila neno Alilotamka lilikuwa ni harufu ya uzima iletayo uzima. Aliongea kwa uwazi na kwa usahili. Maneno Yake yalikuwa kama matofaa ya dhahabu katika picha za fedha.

Inapendeza jinsi gani—kujumuika pamoja na Yesu! Mjumuiiko huo tumepewa ili kuufurahia.... Wanafunzi wa awali waliposikia maneno ya Yesu, walihisi hitaji lao la Mwokozi. Walimtafuta, walimpata na walimfuata. Walikuwa pamoja Naye nyumbani, mezani, pahali pa siri na hata uwandani. Walikuwa pamoja Naye kama watoto na mwalimu wao, kila siku wakipokea toka midomoni Mwake mafundisho ya ukweli Mtakatifu. Walimtegemea Yeye kama watumwa wamtegemeavyo bwana wao.... Walimtumikia Yesu kwa furaha na uchangamfu.

Umuhimu mkubwa umewekwa katika uhusiano wetu. Tunaweza kutengeneza uhusiano mwingi wa kupendeza na wa kusaidia, lakini hakuna uhusiano ulio wa thamani kubwa kama ule ambao mwanadamu mwenye ukomo analetwa kwenye uhusiano na Mungu asiye na ukomo. Tunapounganishwa hivyo, maneno ya Kristo yanakaa ndani yetu.... Matokeo yake ni kuwa na moyo uliotakaswa, maisha ya hadhari na tabia isiyo na mawaa. Lakini ni katika tu kumjua na kuhusiana na Yesu ndipo tunaweza kuwa kama Yeye, Mmoja aliye kielelezo asiye kosea.